



**Komunikadu Imprensa**  
**Tribunál Distritál Baukau**  
**06 Maiu 2022**

**Ofisiál Justisa Tribunál Distritál Baukau la kumpri despaisu tribunál nian  
Julgamentu tenke adia**

Iha 03 Maiu 2022, Tribunál Distritál Baukau adia julgamentu ba kazu ofensa ba integridade física simples no arma brankas ho Nú. Prosesu 0007/19. BCVMS, tanba ofisiál justisa la kumpri despaisu tribunál nian hodi notifika parte sira.

*“Ofisiál justisa sira iha obrigaun kumpri despaisu tribunál nian hodi halo notifikasaun ba parte sira atu partisipa iha aktu prosesusal tuir kompeténsia ne’ebé lei fó ba sira (ofisiál justisa) nune’e la prejudika parte sira nia direitu atu hetan justisa ba sira nia kazu,” dehan Sra. Ana Paula Marçal, Diretora Ezekutiva JSMP.*

Artigu 91 (1) no (3) Kodigu Prosesu Penál kona-ba notifikasaun, iha ne’ebá hateten katak notifikasaun ne’e hodi bolu ema ruma mai tama ka partisipa iha aktu prosesusal no parte ne’ebé mak lei fó kompeténsia hodi halo notifikasaun mak funsionáriu judisiál, ajente polisiál ka autoridade seluk tuir despaisu ka ho ordem ofisioza hosi sekretaria judisiál. Ne’e signifika katak bainhira parte sira atu partisipa iha aktu prosesusal ruma tenke hetan notifikasaun husi parte ne’ebé lei fó ona kompeténsia.

Ba kazu konkretu, iha sala audénsia julgamentu juis titulár informa katak iha loron 17 Juñu 2021, juis titulár hasai ona despaisu ba ofisiál justisa responsável hodi notifika parte sira hanesan arguidu, lezadu no testemuña atu tuir julgamentu iha loron 03 Maiu 2022, iha oras tuku 09:00 dadeer, maibé ofisial justisa responsável la ezejuta despaisu refere nune’e parte sira laiha informasaun no marka prezensa iha tribunál.

Ba kestaun ne’e, prokuradór no defeza husu ba tribunál atu halo adiamentu ba prosesus kazu ne’e no notifika filafali parte sira. Nune’e, juis hasai despaisu hodi adia prosesus julgamentu ba fali iha loron 17 Janeiru 2023, oras tuku 09:00 dadeer. Alende ne’e, juis mós husu ba ofisiál justisa responsável atu apresenta justifikasaun kona-ba tanbasá nia la halo notifikasaun iha prazu loron lima nia laran.

JSMP nota katak despaisu juis nian ba ofisiál justisa atu halo notifikasaun ba parte sira iha tempu ne’ebé naruk loos ka sufsiente, kuaze fulan sanulu nia laran no tribunál mós

iha facilidade suficiente hanesan kareta operasionál no motor ho modelu KLX tolu ne'ebé TDB simu iha 21 Setembru 2021 espesifiku ba notifikasaun nian. Tanba ne'e, tuir JSMP deviaser la akontese problema ne'e.

JSMP hein katak ba oin parte sira ne'ebé lei fó ona kompeténsia hodi halo notifikasaun tenke kumpri nia obrigasaun sira nune'e la prejudika parte sira ne'ebé buka justisa liuhusi justisa formal.

Julgamentu adimentu ne'e prezide husi Juis Dra. Florençia Freitas, Prokuradór representa husi Dr. João Marques no arguidu hetan defeza husi Defensór Públiku Dr. Grigório Maria Lourdes de Lima.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: [ana@jsmp.tl](mailto:ana@jsmp.tl)

Telefone: (+670) 33238883 | 77040735

Website: <https://jsmp.tl>

[info@jsmp.tl](mailto:info@jsmp.tl)

